

四庫全書

集部

欽定四庫全書

甫田集卷十

明文徵明撰

詩八十七首

午門朝見

祥光浮動紫煙收
禁漏初傳午夜籌
乍見扶桑明曉仗
却瞻闔闔覲宸旒
一痕斜月雙龍闕
百疊春雲五鳳樓
潦倒江湖今白髮
可能供奉殿東頭

奉天殿早朝二首

天外鳴鞭肅禁宸，朝廷獻納有司存。
采恩拂曙樓臺迥，衆魏連雲觀闕尊。
夾陛書思端萬笏，上方求諫闢千門。
宮牆樹色深於染，總受天家雨露恩。

月轉蒼龍闕角西，建章雲斂玉繩低。
碧簫雙引鸞聲細，綵扇平分雉尾齊。
老幸綴行班石陛，謬慚通籍預金闕。
日高歸院詞頭下，滿袖天香拆紫泥。

雨中放朝出左掖

霏微芳潤浥霓旌
歷落彤墀散履聲
暝色浮煙迷左掖
碧雲將雨近西清
柳垂青瑣千絲重
水落銀橋萬玉鳴
沾灑不辭袍袖濕
天街塵淨馬蹄輕

雪後早朝

月滿長安雪未消
分明銀海瀉秋濤
光迷萬里璫珂亂
勢壓雙龍玉闕高
曙色漸分鳩鵲觀
凝寒猶在鷺鷥袍
負薪亦有號饑者
願得君王發漢旂

元旦朝賀

仙音縹緲協和鸞天上春回白玉闌日出鷄人齊唱卯
雪消風伯為驅寒萬方玉帛看王會一歲儀文重履端
滿目昇平題不得白頭慚愧直金鑾

進春朝賀

玉殿千官拜冕旒紫衣京兆在前頭四時盛德初臨木
先日嚴寒已送牛氣轉蒼龍當法駕風回明庶動宸旂
聖王和令思行慶次第頒恩下九州

恭候大駕還自南郊

聖主回鑾肅百靈紫雲團蓋翼蒼精屬車劒履星辰麗
先駕旂常日月明十里春風傳警蹕萬方和氣協韶猷
白頭欣覩朝元盛願續思文頌太平

觀駕幸文華聽講

朝下鑾輿幸講堂徐看天仗轉東廂翠旂拂柳宮牆繞
清蹕穿雲閣道長千載明良真際會九朝文物舊彝章
小臣漫廁夔龍後彷彿還瞻日光

慶成宴

花映珍盤出上供風吹韶韻落遙空坐聯日馭紅雲暖
恩湛宮壺瑞露融一代禮成郊社後百年身際太平中
晚酣不記歸來處彷彿春光玉殿東

再與慶成

日射宮花淑景柔春風重醉殿東頭嫵姍不厭倡優拙
宣勸親承禮數稠天上露華恩湛湛庭中和氣鹿呦呦
一聲響節驚禽散錦服中官進御羞

實錄成賜燕禮部

北府書成奏尚方
南宮拜詔許傳觴
青春照坐宮花麗
瑞露浮樽法酒香
邂逅鸞臺修故事
遂令牛走被餘光
濃恩恰似朝來雨
散作槐廳六月涼

臘日賜燕

綺筵錯落映朱旗
百辟承恩燕赤墀
薦蠟尚存周典禮
賜酺聊舉漢官儀
中厨次第催傳觴
列坐雍容各覆卮
潦倒不慚書獵字
殷勤還賦伐檀詩

端午賜扇

剡藤湘竹巧裁將珍重瑤華出尚方四海清涼初拜賜
一時懷袖總生光最憐明月難捐棄即有仁風可奉揚
真覺自天題處濕墨痕狼藉露華香

賜長壽綵綵

紫宸朝下錫靈絲金水橋邊拜命時文繡自天騰五色
光華約臂結雙螭重慚潦倒隨恩澤還忝班行覩盛儀
願得君王千萬壽日華常照衮衣垂

實錄成蒙恩賜襲衣銀幣

雙銀爛爛出朱提，稠疊文繒五色絲。
天子不遺牛馬走，侍臣還忝鳳凰池。
青霄寵渥兼金重，白首遭逢補袞遲。
狼籍天香攜滿袖，春風湛露寫新詩。

再賜銀幣

流銀嘉幣上方琛，畫錫駢蕃雨露深。
朽質何堪施綺縠，虛名元自愧南金。
敢忘珍重酬千載，圖補絲毫有寸心。
白髮茂恩何所自，三年供奉忝詞林。

翰林齋宿

金星爛漫燭微垣獨擁青綾向夜闌宮漏隔花銀箭永
蓮燈垂燼玉堂寒坐聆宵柝霜圍屋想見郊裡月滿壇
鈴索無風塵土遠始知仙署逼金鑾

興隆寺致齋

漠漠香燈佛座前寢衣相對不成眠明裡夙奉廷中戒
清淨來修物外緣竹樹湘簾新月色鬢絲禪榻舊風煙
無端忽憶朝元事笑隔春風又一年

內直有感

天上樓臺白玉堂
白頭來作祕書郎
退朝每傍花枝入
僦直遙聞刻漏長
鈴索蕭閒青瑣靜
詞頭爛漫紫泥香
野人不識瀛洲樂
清夢依稀在故鄉

禁中芍藥

仙姿綽約絳羅紳
何日移根傍紫宸
月露冷團金帶重
天風香泛玉堂春
千年想見翻階詠
一笑羞稱近侍臣
不似人間易零落
上方元自隔凡塵

遊西苑

宛轉瀛洲帶慢坡
螭蜺玉螭壓銀河
廣寒遙見空中樹
太液微生雨後波
雲捲紅妝千步障
風吹瑤蓋萬年柯
太平見說宸游簡
馳道青青長薜蘿

秋日再經西苑

內苑秋清宿露晞
盈盈日采動金扉
松間翠殿團華蓋
天外銀橋入紫微
錦纜稀遊青雀暗
瑤波無際白鷗飛
彤牆高柳無人折
時見中官一騎歸

紫氣

紫氣龍顏穆彤墀虎衛森萬年占帝運一念格天心日
月何虧食華夷仰照臨誰應知有喜白首忝詞林

頌歷

鳳歷從天下千官列陛前青陽壺史奏黃帕侍中傳周
禮存頒朔堯書重紀年白頭供奉裏慚愧得春先

西苑詩十首

萬歲山在子城東北玄武門外蓋大內之鎮
山也其上林木陰翳尤多珍果一名百果園

日出靈山花霧消分明員嶠戴金鼇東來複道浮雲迥
北極觚稜王氣高仙仗乘春觀物化寢園常歲薦櫻桃
青林翠葆深於沐總是天家雨露膏

太液池在子城西乾明門外周凡數里環以
林木亭榭東西跨以石梁瑤華島在其中

泱泱滄池混太清芙蓉十里錦雲平曾聞樂府歌黃鵠
還見秋風動石鯨玉螭蛭蜺垂碧落銀山縹緲自寰瀛
從知鳳輦經遊地鳬鴈徊翔總不驚

瑤華島在太液池中上有廣寒殿相傳遼太
后遊息之所

海上三山擁翠鬟天宮遙在碧雲端古來漫說瑤臺迴
人世寧知玉宇寒落日芙蓉煙裊裊秋風桂樹露團團
勝遊寂寞前朝事誰見吹簫駕綠鸞

承光殿在太液池上圍以甕城殿構環轉如
蓋一名圓殿中有古枯數百年物也

小苑平臨太液池金鋪約戶鎖蟠螭雲中帝座飛華蓋

城上鈎陳繞翠旗紫氣曾迴雙鳳輦青松猶有萬年枝
從來清蹕深嚴地開盡碧桃人未知

龍舟浦在摘華島東北有水殿二藏龍舟鳳舸
列殿陰陰水竇連漢家帝子有樓船蘭橈桂楫曾千里
錦纜牙檣憶往年汾水秋風空落日隋堤楊柳漫青煙
今皇別有同民樂不遣青龍漾碧川

芭蕉園在太液池東崇臺複殿古木珍石叅
錯其中又有小山曲水竇錄成於此焚稿

小山盤折翠嶺呀松檜陰陰輦道斜草長蘭亭迷曲水
雨深桃洞自飄花紫雲依舊圍黃屋青鳥還應識翠華
知是史臣焚草地文光隱隱結紅霞

樂成殿在芭蕉園之南引水為池中建三亭
架朱梁以通梁左右浮以小山名曰九島
其東別鑿澗激水以轉碓磨南田穀成於
此春治故云樂成

太液東來錦浪平芙蓉小殿瞰虛明碧欄蘸影雙龍卧

金少日人
卷十
綠水浮渠九島輕
漾日金鱗堪引釣
拂天翠柳亂聞鶯
激流靜看飛輪轉
天子無為樂歲成

南臺在太液池之南
上有殿曰昭和
下有水田村舍
先朝嘗於此閱稼

青林迤邐轉迴塘
南去高臺對苑牆
暖日旌旗春欲動
薰風殿閣晝生涼
別開水榭親魚鳥
下見平田熟稻梁
聖主一遊還一豫
居然清禁有江鄉

兔園在太液池之西
崇山複殿林木蔽虧
山下

小池石龍昂首而蟠激水自地中轉出龍吻
漢王遊息有離宮瑣闥朱扉迤邐通別殿春風巢紫鳳
小山飛澗架晴虹團雲芝蓋翔林表噴壑龍泉轉地中
簡樸由來堯舜事故應梁苑不相同

平臺在兔園之北東臨太液西面苑牆臺下
為馳道可以走馬武皇嘗於此閱武

日上宮牆飛紫埃先皇閱武有層臺下方馳道依城盡
東面飛軒映水開雲傍綺旒常不散鳥窺仙仗去還來

金華待詔頭都白欲賦長楊愧不才

嘉靖乙酉春同官陳侍講魯南馬修撰仲房王
編修繩武偕余為西苑之遊先是魯南教內書
堂識守苑官王滿是日實導余三人行因得盡
歷諸勝既歸隨所記憶為詩十篇竊念神宮秘
府迥出天上非人間所得窺視而吾徒際會清
時列官禁近遂得以其暇日遊行其中獨非幸
與然而勝踐難逢佳期不再而余行且歸老江

南追思舊遊可復得耶因盡錄諸詩藏之他時
邂逅林翁溪叟展卷理詠殆猶置身於廣寒太
液之間也是歲四月既望識

遊西山詩十二首

早出阜城馬上作

有約城西散冶情春風輟直下承明清時自得閒官味
勝日難能樂事并馬首年光新柳色煙中蘭若遠鐘聲
悠悠歧路何須問且向白雲深處行

是日迷道數
數問程故云

登香山

指點風煙欲上迷，却聞鐘梵得招提。
青松四面雲藏屋，翠壁千尋石作梯。
滿地落花啼鳥寂，倚闌斜日亂山低。
去來不用畱詩句，多少蒼苔沒舊題。

來青軒

寂寂雲堂車馬稀，高明不受短牆圍。
好山宛轉雙排闥，勝日登臨一振衣。
望裏風煙晴更遠，坐來塵土暮還稀。
松間白鶴如嫌客，顧影翩然忽自飛。

香山歷九折坂至弘光寺

偃月池邊寶剎鮮不知賜額自何年行從九折雲中坂
來結三生物外緣歲久松杉巢白鶴春晴樓閣湧青蓮
誰言好景僧能占總落遊人眼界前

碧雲寺

中官于經所
建極其雄麗

翠殿朱扉翔紫清璇題金榜日晶晶青蓮宛轉開仙界
玉闕分明入化城雙澗循除鳴珮玦三花拂檻映幡旌
貴人一去無消息野老依稀識姓名

宿弘濟院

一龕燈火宿山寮人靜方知上界高
關外千峯寒吐月空中羣木夜鳴濤
不愁雲霧衣裳冷祇覺煙霞應接勞
辛苦忙緣難解脫五更清夢破雲璈

遊普福寺觀道傍石澗尋源至五花閣

道傍飛澗玉淙淙下馬尋源到上方
怒沫灑空經雨急湍流何處出雲長
有時激石聞琴筑便欲沿洄汎羽觴
還約夜涼明月上五花閣下聽滄浪

歇馬望湖亭

寺前楊柳綠陰濃
檻外晴湖白暎空
客子長途嘶倦馬
夕陽高閣送飛鴻
即看野色浮天際
已覺扁舟落掌中
三月燕南花滿地
春光都在五雲東

呂公洞

內有耶律
楚材字

何時神斧擘幽崖
古竇春雲福地開
翠壁未磨耶律字
石牀曾卧呂公來
陰寒四面凝蒼雪
秀色千年蝕紫苔
凡骨未仙留不得
剛風吹下夕陽臺

功德寺

西來禪觀兩牛鳴曾是宣王玉輦行寶地到今遺路寢
山僧猶及見驚旌琅函萬品黃金字飛閣千尋白玉楹
頭白中官無復事夕陽相對說承平

玉泉亭

愛此寒泉玉一泓解鞍來上玉泉亭潛通北極流虹白
俯視西山落鏡清最喜須眉搖綠淨忍將纓足濯清冷
馬頭無限紅塵夢總到闌干曲畔醒

西湖

春湖落日水拖藍，天影樓臺上下涵。
十里青山行畫裏，雙飛白鳥似江南。
思家忽動扁舟興，顧影深懷短綬慚。
不盡平生淹戀意，綠陰深處更停驂。

病中懷吳中諸寺

治平寺寄聽松

七尺藤牀一畝宮，青山何處不相容。
大官底用三升酒，長樂愁聞五夜鐘。
澤風煙荒橘柚橫，塘秋色老芙蓉。

幾時歸去楞伽寺常伴林僧看古松

竹堂寺寄無盡

東城古寺萬枝梅一歲看花得幾迴竹徑三年無我迹
松門此日為誰開還應壞壁餘詩草只恐荒碑蝕雨苔
憑仗山僧懸木榻長安倦客且歸來

東禪寺寄天機

從別林僧酒道場幾回飛夢到溪堂夕陽松徑無塵鞅
春水籬根有釣航坐憶同盟多隔世時聞老衲去遊方

不知聽雨南軒下誰與幽人續斷香

馬禪寺寄明祥

閒情每結道人緣不到東禪即馬禪
花發來禽凡幾樹夢回啼鳥已三年
朔風左掖籠貂帽殘雪長安綰玉鞭
不及祥師蕭寺裏茶煙一榻擁書眠

天王寺寄南洲

天王寺裏竹千頭曲榭迴廊舊日遊
別後梅花應自發壁間詩草屬誰收
憶看遠岫開飛閣曾弔荒宮上小丘

白首思歸形夢想封書惆悵問南洲

寶幢寺寄石窗

久客懷歸問舊遊雙娥精舍屋東頭絕憐近市無塵到
曾是尋僧竟日留滿地綠陰誰結夏擁籬黃葉更宜秋
玉泉清冽應無恙憑仗山厨設茗甌

昭慶寺寄守山

搔首長安望闔閭風煙漠漠九秋餘正思黃葉南朝寺
忽把飛雲慧遠書東壁磨碑知有待北牕懸榻竟何如

自憐白首無裨補虛棄閒緣卧直廬

秋日早朝待漏有感

鐘鼓殷殷曙色分紫雲樓閣尚氤氲
常年待漏承明署何日掛冠神武門
林壑秋清猿鶴怨田園歲晚菊松存
若為久索長安米白髮青山忝聖恩

懷石湖

茶磨山前宿雨晴行春橋下綠波平
吳兒越女齊聲唱菱葉荷花無數生
落日夷猶青雀舫孤煙縹緲望湖亭

平生走馬聽鷄處殘夢依依是越城

感懷

三十年來麋鹿蹤若為老去入樊籠五湖春夢扁舟雨
萬里秋風兩鬢蓬遠志出山成小草神魚失水困沙蟲
白頭博得公車召不滿東方一笑中

即事

卯酒意醺然焚香閉閣眠長安塵十丈不到竹牕前

其二

露下葛衣單
叅差林影寒
依然殘夜月
不在石湖看

其三

上書無復志
把酒自多情
籌國諸公在
吾何耻聖明

其四

青衫跨羸驂
白首供朝謁
自笑老忘還
不嫌官太拙

送錢元抑南歸口號十首

一官貧薄僅三年
不計歸囊肯計遷
笑殺當時高隱者

區區猶待買山錢

吳田百畝歲常荒家計蕭然只草堂却有春眠濃似酒
不將朝市博江鄉

黃塵車轂不曾停白髮懷思戀闕廷誰是東吳錢若水
歸來雙鬢只青青

風塵西北三邊警災沴東南萬姓艱世事去今無限在
只應張翰不相關

高人原不愛高官帝與官銜寵退閒添得空名將底用
批風抹月管青山

義君五十賦歸歟我亦頭顱五十餘把袂不須傷遠別
病夫行已厭塵裾

少時同學晚同朝一着輸君去獨高落日黃塵回馬處
滿頭衰髮不堪搔

老去懷鄉不自欣況堪客裏送歸人只應曉夢隨君去
茶磨山前看早春

三月吳門柳絮飛到家應及子魚肥殷勤相送還相祝
管領湖山待我歸

舊遊何處石湖西故友相思意欲迷為語近來憔悴盡
日騎羸馬聽朝鷄

送石齋太傅致仕還蜀

春風歸馬擁都城爭羨賢哉太傅行吾道正從占出處
斯人端不負平生雲移玉壘堪支笏水落瞿塘便濯纓
落日啼猿夔府道定依南斗望神京

朝辭黃閣謝君王暮向成都問草堂璇轂親扶堯日月
雲章曾補舜衣裳由來道大難為用此日功成且退藏

滿地落花春夢醒
濯清亭上聽滄浪

送戴時重食憲之蜀

劍南旌旆拂重關
新繫臺衙舊法官
此去籌邊知有畧
于今治蜀却須寬
高懷雅稱江山壯
聖代休歌道路難
萬里橋東明月上
定應回首憶長安

姚太僕思永致仕進秩光祿少卿

聖君應惜侍臣還
特與卿階寵退閒
餘澤猶堪賁桑梓
散衙聊復領溪山
向來馬署寧須問
此去鴻飛不可攀

莫道先生總忘世鳳毛今在紫宸班

秦茂功出按江右

就送母還越

春風四牡正駸駸一道咨諏屬使君肯惜輜車馳坂道
還應玉節動星文持輿見說能將母舍爵何妨自策勲
聖代優賢兼祿養不煩回首惜孤雲

大江西下號繁雄宣察遙煩繡斧公斥壤須憐新喋血
遠人應識舊乘驄一時風節埋輪上千里江山攬轡中
珍重咨詢臣子事願將民隱達宸聰

追送石潭宗伯次歸舟喜雨韻

宦情牢落澹於秋
歸興蕭然一釣舟
雨露難忘天地德
江湖還繫廟廊憂
古來興廢非人力
君子行藏與道謀
滿目青山天萬里
煙波浩蕩沒輕鷗

送何少宰左遷南京工侍二首

拜章伏閣舉倫彞
耿耿忠言動赤墀
名義千年元自重
禮文一代敢誰私
直躬自古難忘蹇
了事知公不是癡
去去保釐非遠謫
未須惆悵續騷詞

何人發難千倫紀有客輸忠翼聖明禮重乾坤那可易
事干名教得無爭百年富貴浮雲淡萬里江湖白髮生
李白從來多感慨鳳凰臺上望神京

送唐御史應韶應天府丞

曾持繡斧事澄清暫輟班行佐尹京總為希仁能鎮物
況來唐介有先聲萬年宮闕瞻豐鎬六代江山入宰衡
去去望之非久外安排台鼎望功成

送胡承之少卿左遷潞州倅

一行詔下便遐征太息天王本聖明此際亦知言可諱
使君自以去為榮浮雲落日天涯恨白鳥滄洲物外情
去去江湖塵滿目不知何處望神京

送陳良會御史左遷合浦丞

誰興濮議紊彝章國是紛然失故常慷慨一言思悟主
艱難萬里遂投荒君於職業真無負我忝鄉人與有光
去去還珠亭下路蘇公千載有遺芳

送喬冢宰致仕還太原二首

四十餘年仕闕廷歸來雙鬢未全星一身用舍關天下
千載風流尙典刑啟事從來誇水鑑移文曾不愧山靈
等閒頌德知何益自有勲名照汗青

四朝文物仰前修一日功成遂乞休君子致身惟道在
野人思治願公留狄門桃李叨知己白下江山憶舊遊
莫謂白巖多樂事希文常負廟廊憂


送柯奇純主事歸莆陽

新命才看下玉除歸心早寄入閩車不須駟馬誇題柱

且着斑衣慰倚閭因病得閒情好在移忠為孝樂何如
春風佇看重來日黑髮光陰正有餘

送陳尚書南京工部

老成聞望壓羣僚南去台階八座高江左舊都供覽勝
國家留務重分曹經營列省工惟叙出入三朝我獨勞
最是闕庭忘未得鳳臺高處首頻搔



甫田集卷十

欽定四庫全書

集部

甫田集卷十二

五

詳校官給事中臣王鍾健

中書_臣劉源溥覆勘

總校官檢討_臣何思鈞

校對官學正_臣湯垣

謄錄舉人_臣鰲圖

欽定四庫全書

甫田集卷十一

明文徵明撰

詩五十首

送冢宰朱玉峯之南京

留司晚望重衡鈞三十年來侍從臣
遠去獨安恬退節
衆中欣見老成人
兩京規制遙相望
六代江山蹟未陳
盛世官遊應自樂
有人東望惜音塵

晚通仕籍喜同朝此去江東屬望勞留務從來須長者
雅懷自喜得閒曹百年家世睢陽重一代文章甲榜高
去去壯遊知未已秋霜才入髩邊毛

送孫從一編修僉憲浙江

羨君瀟灑玉堂仙顧我飄零亦備員海內論文兼兩世
班行聯署恰三年別腸忍折燕臺柳宦況遙飛越水船
誰謂江南身漸遠憂心常在五雲邊

盛斯顯南京司封

薊門秋風天早寒潞河生波楊柳殘沙塵吹衣日色薄
仙郎九月辭長安長安東下浮官舸去去心馳大江左
人情往往計南北委順知君無不可憶我前年入國門
連珂接珮多鄉人豈無同朝歡不及同鄉美蕭條逆旅
中吳音更堪喜宦轍羈人不得齊一朝散去各東西向
來坐客日以減子行更使吾悽惋何如重為交游惜再
世通家非一日況也葭莩添姻戚人生得意無南北我
漫惜君君自適建業江山天下奇聖皇昔此開鴻基穹

宮傑構比豐鎬列職分曹同保釐百年形勝真雄壯奕
葉名家更清暢畫省雍容如列仙簿書蕭散清而閒坐
曹讀書百不闕有時騎馬看鍾山

送趙麗卿

青驄款款旆悠悠遙指孤雲向石頭到日長安應在望
夕陽江上更登樓

旅居鄰近最多情幾度趨朝並馬行今日吾留君却去
共誰長樂聽鐘聲

西風吹散馬頭塵，忍見南來白水津。
不獨別離傷遠道，衰遲亦是要歸人。

清秋北鴈盡南征，我獨東歸計未成。
為計金陵文酒伴，年來白髮滿頭生。

送洪玉方

才接鴛行喜有餘，又驅王事駕軺車。
君頻有役難為別，我老思家欲附書。
道路風波方浩蕩，歲寒冰雪定何如。
此行國計從知重，四海民勞亦可虞。

送于器之廉憲還滁

東風吹盡燕臺雪，潞水垂楊已堪折。自笑人生得幾時，
三年兩度都門別。都門日日有行人，我獨與君情最親。
向來宦轍苦南北，去此尚是江湖身。君向江湖我塵土，
從此雲山亦修阻。豈惟去住隔雲泥，本自疆封限吳楚。
憶得滁陽始相見，紺髮垂雲俱弱冠。四十年來轉首空，
升沉異勢容顏變。不獨容顏改舊時，世情翻覆浮雲移。
江湖風月足濤浪，道路天險藏欽戲。君能不易平生志，

豈識人間有機事不將嫵媚獵時名更樹風聲招物忌
踐馭中外垂廿年空囊羸馬意蕭然昂藏不受世人識
骯髒徒為知己憐知己憐君君不恨浙水東西有公論
但須俯仰面無慚未怕怜悻身獨困平生頗厭乞墻徒
昏夜哀憐正堪憫若教游宦損初心相去中間不能寸
此志悠悠我獨知青山不負當年期幽谷雲深每獨往
瑯琊月出詠歸遲醉翁亭下泉堪釀君去歸兮我惆悵
四時朝暮古人情同負幽懷不同賞

送盧師陳奉使紫荊關

季冬繁霜雪塞草寒不菲之子遵朔方駕言即長岐揚
旂灞水北促轡漁陽西豈不念修阻王程有嚴期丈夫
既策名委身事馳驅詔誡重將指辛苦焉得辭况君志
遠遊夙昔攻文詞上谷古雄鎮幽并勢威夷於焉寄懷
慨亦足宣遐思豈若抱槩人終年守金閨鳴珂紫雲闕
端簡白玉墀通籍豈不佳旅進曾何俾古賢榮有事去
子行無稽念惟羈愁中復此相仳離長風西北來吹我

雙髻絲高歌激清商願倒風前卮

送王承恩侍講叅政四川

鳥道巖壚萬里賒從臣分省向三巴中朝聲望雲山重
內史文章錦水華爛熳新恩蒼玉節依然舊署紫薇花
只應未忘論思地翹首金鑾北斗斜

送蔡巨源叅政

廿年湖海漫相知再見都城總別離旅客倦遊常卧病
使君王事有程期清風萬里閩山節明月孤舟潞水思

塵土欺人雙髻短不知何處更論詩

送陸舉之

三載追隨供奉班
方舟千里又同還
君行問寢辭青瑣
我已焚魚住碧山
塵土自憐羸馬倦
江湖莫羨白鷗閒
匆匆手袂何須戀
剡曲吳淞一水間

致仕出京言懷

獨騎羸馬出楓宸
回首長安萬斛塵
白髮豈堪供世事
青山自古有閒人
荒餘三逕猶存菊
興落扁舟不為蓴

老得一官常臥病可能勲業上麒麟

白髮蕭疎老秘書倦遊零落病相如三年漫索長安米
一日歸乘下澤車坐對西山朝氣爽夢回東壁夜窓虛
玉蘭堂下秋風早幽竹黃花不負余

馬上口占謝諸送客十首

三忠祠下夕陽明幾度含情送客行今日諸君還送我
多應不異昔時情

昔時送客每懷歸千里鄉心日夜飛回首三年幾離別

只應今度不沾衣

小試聞官便乞身素衣曾不染緇塵諸君亦自多情致
不送官人送散人

散人廿載盜虛聲敢謂從前少宦情補袞銘鍾羣彥在
功名原不到書生

解却朝衫別帝州一竿煙水五湖舟故人莫作登仙看
老病無能自合休

諸君送我帝城東立馬傳杯犯朔風莫嘆柳枯難折贈

春光都在酒波中

別酒淋漓滿路岐
酒闌無奈客東西
多情獨有斜陽色
一路殷勤送馬蹄

浮雲世事兩悠悠
一出都門百念休
獨有懷人情不極
雙溝南畔數回頭

立馬雙橋日欲斜
沙塵吹霧暗征車
從今絕跡江南去
只見青山不見沙

三載愁聞長樂鍾
夢魂常繞五湖東
此身忽在扁舟上

開眼猶疑是夢中

阻冰潞河簡同行黃太史才伯

長河十月朔風悲零落貂裘不受吹冰雪崢嶸驚歲晚
江湖寂寞滯歸期誰憐阮籍窮途泣自笑穰侯見事遲
忽憶同行黃太史篝燈何處擁書帷

次韻荅徐子容學士見懷三首

解却從前供奉衣朝行除籍簡書稀非關踈拙明時棄
自惜驅馳雅志違飄泊又驚年欲暮蹉跎再見月流輝

玉堂學士青雲上也念天涯人未歸

霜華慘淡襲征衣關朔蕭條鴈影稀遊子天涯苦行役
故人歲晚惜分違還家短夢秋無賴伴客殘缸夜有輝
猶勝前時羸馬上滿頭風雪趁朝歸

南來拂拭芟荷衣旋覺沙塵出郭稀我已去來無復戀
天於人事每多違流澌十月關河冷積雪千山草木輝
想見幽居無限好春風應待主人歸

次韻荅唐雲卿禮部二首

關河歲晏客衣單
滿髻秋風裏
鶻冠塵土自憐疲馬倦
江湖誰念白鷗寒
去來信有天機在
閱歷方知道路難
憔悴不忘飄泊處
方舟冰雪潞河干

漂泊東吳萬里船
漫勞詩帖慰窮年
君知世有東方朔
我愧身非魯仲連
夢斷五湖天渺渺
愁懸雙杵月娟娟
相逢總是羈棲者
目送飛鴻共黯然

次韻答張西峯少參

司空揣分自宜休
元亮無心任去留
四海何人憐白髮

百年吾道有滄洲
破除塵夢惺惺在
點檢山林事事幽
即去已輸君一著
十年前與白雲遊

臘日與才伯小酌追懷去臘午門賜燕

去歲嘉平燕紫宮
長筵錯落午門東
一時隨例沾恩澤
此日追思嘆轉蓬
節敘不禁雙鬢改
江湖猶幸一樽同
柳條萱草何須問
且共天涯目斷鴻

旅懷

陰凝冰未泮
雪盡歲還窮
世事浮榮外
生涯久病中
心

旌搖落日天影度冥鴻短髮垂垂白那堪犯朔風

野行因過廢寺

久客念搖落意行還寂寥餘寒棲短褐斜日帶荒寮歲
事行將盡羈寇黯欲銷雲房才咫尺便覺遠塵囂

某比以筆劄逋緩應酬為勞且聞有露章薦留
者才伯貽詩見戲輒亦用韻解嘲

不用浮文薦子虛底須滄海問遺珠若為尚作稽康累
嬾慢難酬滿案書

絕澗深林付窅冥三年慚負草堂靈
青山應笑東方朔何用俳優辱漢廷

千年處士說林逋漫有聲名達帝都
只辦梅花新句好莫論封禪有書無

春風次第水增波千里清淮一棹過
更恐南行勞應接隨堤新柳似新鵝

平生藝苑說荆關點筆雖忙意却閑
何用更騎黃犢去右丞胸次有江山

才伯過訪

落日生愁地窮陰欲雪天歸心聞斷鴈衰髻逼殘年光
景陳編裏情懷薄酒邊平生黃叔度相見即欣然

除夕二首

撥盡壚灰夜欲晨不知飄泊潞河濱燈花自照還家夢
道路誰憐去國人浩蕩江湖容白髮蹉跎舟楫待青春
只應免逐雞聲起無復鳴珂候紫宸

黯黯離愁酒半醺不眠閒讀送窮文旅窓燈火寒猶在

村巷鷄聲歲又分千里家山歸有漸百年心事老無閒
未妨去國還飄泊已把閒身等白雲

丁亥元日次才伯韻二首

東風早晚到天涯客子逢春正憶家
栢葉漫傳元旦酒江梅應發故園花
不愁逆旅無親戚依舊江湖有歲華
深負鄭莊騰薦剡遊巖痼疾久烟霞

鄭謂啓
範也

朝日曈曨照水涯春風次第到貧家
輕煙漠漠初含柳殘雪飛飛不作花
芳草開筵酬上日紫雲飛鞚憶東華

即須作伴還鄉去
滄海東頭看落霞

冰泮志喜次黃才伯韻

吹面東風不作寒
斷冰千片下晴灘
已看積雪經冬盡
正好垂楊映水看
滿目江山勞應接
到家櫻筍未闌殘
只應今夜扁舟夢
先繞吳門鬪鴨闌

過揚州登平山堂二首

鶯啼三月過維揚
來上平山郭外堂
江左繁華隋柳盡
淮南形勝蜀岡長
百年往事悲陳跡
千里歸人喜近鄉

滿地落花春醉醒晚風吹雨過雷塘

平山堂上草芊綿學士風流五百年往事難追嘉祐蹟
閒情聊試大明泉隔江秀色千峯雨落日平林萬井煙
最是登臨易生感歸心遙落片帆前

還家志喜

綠樹成陰逕有苔園廬無恙客歸來清朝自是容疎嬾
明主何嘗棄不才林壑豈無投老地煙霞常護讀書臺
石湖東畔橫塘路多少山花待我開

甫田集卷十一

欽定四庫全書

甫田集卷十二

明文徵明撰

詩二十七首

李少宰杭中丞劉柴二光祿置酒

丁亥

冠蓋雍容總卧龍
清時吏隱大江東
黃花初過重陽節
白髮來邀栗里翁
豈有聲名驚四海
解忘形跡荷諸公
浮塵不到清樽畔
舉扇無勞障北風

趙麗卿侍御邀遊冶城

落水蕭蕭帶遠空，冶城高處見秋風。
重將白髮遊江左，依舊青山似洛中。
有客樽前談夢鹿，何人天際慕飛鴻。
荒塹寂寞埋秋草，猶自風流憶謝公。

徒步至寶光寺

布襪青鞋短褐衣，酒樽詩卷一僮隨。
白頭自笑曾供奉，徒步誰憐老拾遺。
五畝喜聞秔稻熟，重陽還恨菊花遲。
松寮竹谷逍遙地，時有山僧乞小詩。

九日與彥明登雨花臺

雨花臺上雨初乾，野色江光落坐間。
豈謂旅遊逢九日，共來把酒看三山。
老年節物偏生感，到處雲林不負閒。
落木滿空秋萬里，暝禽遙帶夕陽還。

題蘭

炎夏悠悠白晝長，空齋睡起拂匡牀。
不須甲煎添金鴨，氣泛崇蘭滿几香。

瀟湘八景

濕雲載秋聲萬籟集篁竹江湖白髮長獨擁孤蓬宿

瀟湘夜雨

月出天在水平湖淨於席安得謫仙人來聽君山笛

洞庭秋月

孤帆落日明青山相映帶遙遙萬里情更落青山外

遠浦歸帆

征鴻戀迴渚欲下還驚飛葦深繒繳繁歲晚稻梁微

平沙落鴈

鷄聲茅屋午
靄靄墟煙白
市散人亦稀
山空翠猶滴

山市晴嵐

曉網白鷗沙
衝煙青箬笠
欸乃一聲長
江空楚天碧

漁村夕照

日沒浮圖昏
遙鍾出煙嶺
應有未眠人
冷然發深省

煙寺晚鍾

密雪灑空江
雲冥天浩浩
寧知風浪高
但道漁簑好

江天暮雪

畫牡丹

粉香雲暖露華新
曉日濃薰富貴春
好似沉香亭上看
東風依約可憐人

憶昔四首次陳魯南韻

三年端笏侍明光
潦倒爭看白髮郎
只尺常依天北極
分番曾直殿東廊
紫泥浥露封題濕
寶墨含風賜扇香
記得退朝歸院靜
微吟行過藥闌傍

紫殿東頭敞北扉
史臣都着上方衣
每懸玉珮聽鷄入

曾戴宮花走馬歸此日香鑪違伏枕空吟高閣靄餘輝
三年歸卧滄江上猶記雙龍傍輦飛

扇開青雉兩相宜玉斧分行虎旅隨紫氣氤氲浮象魏
彤光縹緲上罽毼幸依日月瞻龍袞偶際風雲集鳳池
零落江湖儔侶散白頭心事許誰知

一命金華忝制臣山姿偃蹇漫垂紳媿無忠孝酬千載
曾履憂危事一人陞擁春雲嚴虎衛殿開初日照龍鱗
白頭萬事隨煙滅惟有觚棱入夢頻

竹雀

落木蕭蕭苦竹深茅簷斜日喚雙禽
棘叢豈是藏身地三月春風滿上林

千葉梅與方山人同賦

細梅奕葉照瓊枝不是橫斜舊日姿
繁雪吹香春翦翦冷雲團樹玉差差
羅浮夢斷情稠疊瑤圃風生珮陸離
一任堦前明月碎清真不負歲寒期

靜隱

掃地焚香習燕清蕭然一室謝將迎坐移白日花間影
睡起春禽竹外聲心遠自應人境寂道深殊覺世緣輕
問奇尚有門前客却恨青山不揜名

顧華玉以書邀予為西湖之遊病不能赴詩以
謝之

舊約錢塘二十年春風擬放越溪船却憐白髮牽衰病
應是青山欠此緣漫說西湖天下勝負他北道主人賢
只餘好夢隨潮去月落空江萬樹煙

中秋日晚雨忽霽與諸友看月

晚雨新晴客款扉
天時樂事不相違
眼前愁緒浮雲散
坐上佳人碧月輝
誰見入河蟾不沒
空憐繞樹鵲驚飛
多情惟有清光舊
照我年來白髮稀

對酒

晚得酒中趣
三杯特暢然
難忘是花下
何物勝樽前世
事有千變人生
無百年還應騎
馬客輸我北窓
眠

觀書

老眼視茫然時時手一編未能忘習氣聊復遣餘年
欹山窓下篝燈細雨邊誰應知此味自結靜中緣

煮茶

絹封陽羨月瓦缶惠山泉至味心難忘閒情手自煎
地鑪殘雪後禪榻晚風前為問貧陶穀何如病玉川

晏起

林下將迎寡頽然萬事捐老知閒有益病與嬾相便
殘夢荒鷄外輕寒總帳前從教貧到骨不負日高眠

南田集卷十二

欽定四庫全書

甫田集卷十三

明 文徵明 撰

詩三十六首

春雨漫興

春雨蕭蕭草滿除
春風吾自愛吾廬
高情時誦閒居賦
老眼能抄種樹書
金馬昔年貧曼倩
文園今日病相如
焚香燕坐心如水
一任門多長者車

雨後

積雨初收風乍顛城南花事已茫然黃鸝繞樹空千轉
白髮傷春又一年竹几蒲團供坐睡茗杯香鼎有閒緣
客來莫話長安事自理南華物外篇

壽方矯亭

季鷹久已卧江東再入修門簡帝裏白首豈知東觀樂
青山終戀北窓風一時出處如公少六袞庚年媿我同
願把綸竿相逐去江湖滿地兩漁翁

上巳日石湖小集

楞伽湖上晚風和
茶磨巖前宿雨過
士女競浮青雀舫
野人自占白鷗波
春來花鳥閒情在
老去山林樂事多
辦取一罇粟令節
扣舷聊和竹枝歌

結草菴僧相邀阻雨不行

城南有約訪招提
風雨滄浪只尺迷
惆悵一春能幾醉
蹉跎四事苦難齊
花間細溜沾衣袖
道上豐泥沒馬蹄
孤負山僧清淨供
一窓離思共誰題

夜坐

幽人被酒夜不眠攬衣起坐垂堂前
參差花影忽滿地仰見明月流青天
微風吹空星漠漠時有羈鴻度寥廓
美人不來更漏沉天南縹緲銀河落

庭前蜀葵

庭下戎葵高十尺紫莖入簾明的皪
誰令豔質不逢春却有丹心解傾日
輕塵不飛朱夏清翠翹鏤日陰亭亭
南風吹幃殘酒醒寂寞闌干晝方永

賦得廬山送盧師陳

誰見匡廬百疊蒼
輶車八月下潯陽
天開畫障芙蓉出
風約銀河瀑布長
秀色從來堪攬結
壯遊還待發文章
因君忽動江湖興
便擬東林問草堂

睡起

睡起西齋片雨過
綠陰庭院晚涼多
烏衣春盡渾無語
白苧秋來漫有歌
世態風雲從變幻
山林日月未蹉跎
却憐逸少猶多事
時寫黃庭換白鵞

八月初九日見月

暮空雲斂月初弦
露氣星光共渺然
回首棘闈供試事
秋風夢斷十三年

無錫道中遇雪夜泊望亭

北風吹朔雪飛霽
雜零雨孤舟暮不前
收帆得沙渚天
垂野陰合日暝江
雲返川原入蕭條
林木積縞素寒庵
噤不鳴饑鳥驚還
聚舉酒不成懽挑
燈時自語飄泊豈
在遠出門即羈旅

長林風怒號天低浦雲黑空村煙火微近渚漁舟集路
暗行迹稀蒼然見寒色野泊不成眠羈覓還惻惻昏燈
黯欲絕歸夢迷咫尺戍遠更漏沉川寒聲影息不知積
雪深夜久孤蓬仄

閏正月十一日遊玄妙觀歷諸道院晚登露臺
乘月而歸次第得詩七首

探春行覓羽人家洞裏仙挑未着花一段閒情杯酒外
山童能供竹間茶

行披聲確履蒼虬曲徑穿雲古洞幽只尺風煙千里外
居然人境見丹丘

仙侶登真幾百年清風遺影尚依然琳琅翰墨精神在
我欲臨文喚恕先

道人相見古梅邊為寫幽情拂響泉窻外南枝春尚淺
雪英千片落冰絃

春風吹髻思悠悠來上彌羅百尺樓城郭萬家塵似海
祇應高處不知愁

古殿悠悠徑有苔
松扉端為野人開
匆匆不盡登臨興
有待他時看竹來

神清殿曲倚闌干
市散人空萬井間
莫負仙臺今夜月
明朝日出是塵寰

二月廿六日游天池諸山

西北羣山列翠屏
天池宛轉帶支硎
行穿壑谷身忘倦
忽聽松風酒又醒
歲閏故應春緩緩
民饑欣見麥青青
老年行樂知無幾
莫負樽前雙玉瓶

九日婁門勝感寺

晚禾垂穗野田平
九日登臨宿雨晴
出郭由來少塵事
逢僧聊得話浮生
秋霜落木黃花節
破帽西風白髮情
却喜東林能破戒
提餅沽酒醉淵明

北江憲副自越州訪余吳門飲於杜氏明遠樓
相逢相別思悠悠
越水吳山爛漫遊
時事難言聊對酒
長安在望漫登樓
百年春夢蕉中鹿
萬里秋風海上鷗
不盡平生相許意
白頭頻把舊吳鉤

除夕
乙巳

樽酒淋漓半醉餘
疎燈寂歷夜何如
一行剛了牀頭歷
四壁聊齊架上書
衰齒可堪時數換
窮愁應與歲俱除
東風喜得春來准
早有梅花慰索居

元旦書事
丙午

奕奕祥光報令辰
融融淑氣轉洪鈞
開門聊自占風色
展刺先欣見故人
晴日笑談驚隔歲
暮年光景喜逢春
桃符歷日年年事
一度相看一度新

五月望日登望湖亭

是日微雨作寒

木末虛亭瞰碧瀾倒飛天影入憑闌嵐光浮動千峯濕
雨氣薰蒸五月寒石磴躡雲芒履短松風吹雨苧袍寬
狂吟莫怪遲歸去白髮還能幾度看

汎湖

春盡南湖碧玉流故人湖上共夷猶平桃野渡沿青草
疊鼓中川起白鷗雲日霏霏梅子雨風蒲獵獵藕花洲
行春橋外山千疊盡逐波光上綵舟

除夕

酒闌燈燼夜茫然撫事追思十載前坐上漸看同輩少
眼中殊覺後生賢江城寒薄梅花早原野霜清落木堅
皮骨已空心力盡還將衰髻待新年

丁未九日與履約諸君同泛石湖就登上方

宿雨初晴水拍天碧雲微歛日華鮮時當黃菊茱萸候
秋在滄洲白鳥邊柳外畫橋人似蟻湖心蘭棹酒如泉
攜壺更醉湖山上白髮重逢又一年

是歲閏九月再汎

剛喜重陽臨閏月不辭老病復登臺多情秋色依前在
有待雛花故晚開佳節從知難再值青山端不厭重來
畫船記取橫塘路十里笙歌載月回

題畫

溪雲冥冥溪雨急長空倒垂溪水立凌亂春潮萬壑搖
低迷暮靄千林濕余生雅有滄洲適曾擁孤篷聽蕭瑟
夢斷紅塵二十年江湖獨往興依然偶拈秃筆掃東絹

便覺吳淞落并剪金君家住雲水鄉朝煙暮雨對林堂
若為老去厭真蹟翻愛狂夫灑狂墨就中妙解誰應識
萬里雲煙開素壁

紫瑤翠琰開蒼壁下有蒼松幾千尺濃陰幕歷森畫寒
虬枝拂空根束石石連灌莽榛欲絕路繞松根更斜出
仙源近遠不可窮却有幽人在山澤山澤幽人坐倚松
仰看出沒山雲空眼中溶溶霏暮靄耳畔謾謾鳴天風
崩崖一線削積鐵玉泉百丈飛晴虹吳中山水清且遠

老我平生素遊衍偶然點筆寫秋巒恍惚遊蹤出東絹
金君有癖與我同每每神遊翰墨中贈君此幅應有以
咫尺相看論萬里

十月山城霧雨收江南春淺類清秋窓前覓得新成句
木葉蕭蕭雜水流

看山何必待春晴雨裏看山分外明持蓋衝煙覓詩去
不知身在畫中行

長松搖日影亭亭無限江頭倚杖情鴻鴈欲來天拍水

白雲收盡暮山橫

雙禽棲息一枝安
映雪離離更好看
一種羈情誰識得
暮林風急羽毛單

壽東畬錢先生

東畬先生古貞臣
平生耿挺標清真
廿年中外肆敬歷
所至秉節宣皇仁
浮雲漠漠有變幻
長岐往往多風塵
孤征方出霄漢上
一笑已脫風波身
莫言有才用未極
天地深機自消息
憑將強健博高官
留取有餘還造物

祇今優游經幾年八旬行及顏蒼然霜松雪栢澗壑邊
紫芝玉樹階庭前人世長生能有幾如公豈獨神仙比
向來富貴等浮雲未盡勲名付兒子二兒駟馬日邊歸
捧檄升堂試舞衣靈椿丹桂初光輝嗚呼靈椿丹桂初
光輝千秋萬歲願無違

賀東畬錢先生構別墅

共說于公治獄仁還聞韋氏薄籬金生兒已副高門望
作室能忘肯構心一脉承傳書種在百年培養慶源深

庭前手植三槐樹會見森森長碧陰

已酉除夕

八十衰翁仍送歲
鑪薰燈影共婆娑
青雲志業消都盡
白髮光陰得最多
天地勞生空蠹簡
江湖得意有漁蓑
孫曾繞膝情堪戀
後飲屠蘇且笑歌

甫田集卷十三

欽定四庫全書

甫田集卷十四

明文徵明撰

詩四十八首

人日直夫東園小集

雪後江梅燦玉英蕭然人日半陰晴
雜占誰問東方朔妙思空懷薛道衡
綵勝千年傳故事菜盤七種薦春羹
白頭不落山林事又向名園聽早鶯

立春

雪消紅日麗中天，喜見鞭春在臘前。
次第三陽開景運，尚餘八日是殘年。
梅花消息嚴寒後，綵勝情懷薄酒邊。
辦取物華供帖子，暖痕浮綠草生煙。

玉蘭花

綽約新妝玉有輝，素娥千隊雪成圍。
我知姑射真仙子，天遣霓裳試羽衣。
影落空階初月冷，香生別院晚風微。
玉環飛燕元相敵，笑比江梅不恨肥。

張夏山輓詞

憶隨仙侶仕瑤京幾度朝回並馬行回首舊遊成大夢
燕山吳水不勝情

出守毘陵歲再更我時吳苑亦歸耕相逢相別多惆悵
何況泉臺隔死生

春風陽羨百花明攜手張公洞裏行二十年來誰在者
白頭揮淚讀題名

三年常守念孤窮教養雍容有古風為理無名百年賦

至今赤子頌張公

驄馬使君前建守仁恩十載兩回施武夷山下棠千樹
盡是張公去後思

叅藩江右寄旬宣一道清風萬口傳底事讒言能亂國
又將書劒下西川

西川戡難策勲名信是胸中有甲兵才大恨無施用地
西風吹淚錦官城

扁舟北上又新除別我吳門意有餘豈謂間關兔獨返

傷心空讀寄來書

記得相逢十載前
我時白髮子青年
却憐後事翻多恨
寒月淒風倍黯然

夏王山下月離離
宰樹驚風不盡思
惆悵高人埋玉地
何人為寫墓前碑

春歸

三月春光積漸微
不須風雨也應歸
與人又作經年別
回首空驚昨夢非
江燕引鷗芳草滿
林鶯出谷杏花稀

沈郎別有傷情地不為題詩減帶圍

題漁隱圖

江南雨收春柳綠碧烟歛盡春江曲十里蒲芽斷渚香
千尺桃花春水足溪翁鎮日臨清渠坐弄長竿不為魚
太平物色不到此安知不是嚴光徒

右春

江頭夏雨十尺強晚波搖日空江涼遊魚澆灑樂深數
不謂人間有漁筍筍得江魚不稅官自食自漁終歲歡
輸租轉賦世途惡漁家自得江湖樂

右夏

漁翁老去頭如雪，短笠輕蓑舟一葉。
百頃魚蝦足歲租，十隻鸕鷀是家業。
橫笛朝衝柳外風，浩歌夜弄波心月。
不嫌湖上有風波，世路風波今更多。

右秋

煙沉風緊鳴蕭瑟，江湖歲晚玄冥肅。
寒塘日出曉光浮，村甕茅柴酒初熟。
網得冰鱗不入城，自漉瓦盆招近局。
欸乃一聲煙水長，葦深江靜燃湘竹。

右冬

阻風宿九里湖

雲涵長空斷鴈呼，水聲推岸雜風蒲。
扁舟卧聽三更雨。

一葦難航九里湖，繞榻波濤歸夢短。
隔林煙火遠村孤，人生何必江山險。
咫尺離家即畏途。

梁溪道中夜行

雨餘新水漫風外一帆輕，山繞湖南去人從畫裏行。
天空雲樹渺月出暮潮平，煙靄知何處漁歌時一聲。

辛亥除夕守歲

坐戀殘年漫有情，夜堂燒燭待天明。
不愁老大無同輩，祇覺聰明愧後生。
得歲笑看新舊歷，無眠厭聽短長更。

香消酒冷人初靜，忽報晨鷄第一聲。

壬子元旦飲毛石屋家觀郡邑迎春，蓋明日立春也。次東坡韻。

昨夕今朝迹已陳，頭顱種種歲華新。土牛郭外才驅厲，綵燕筵前已得春。對酒不應談世事，賞心剛喜及良辰。坐中潦倒誰應甚，老我頽然第一人。

新夏

暖風庭院草生香，晴日簾櫳燕子忙。白髮不嫌春事去，

綠陰自喜夏堂涼閒心對酒從時換老倦拋書覺晝長
客有相過同一笑竹鑪吹火試旗鎗

袁魯仲邀予登列岫樓予自胥臺沒數年不登
矣

故人湖上有高樓十載清罇續舊遊飛翠窓中仍列岫
片帆天際見歸舟依然綠樹啼黃鳥無賴青山笑白頭
不盡阿戎淹戀意渚雲江草兩悠悠

是晚過行春橋翫月再賦

行春橋上月娟娟杜若洲西宿畫船萬鏡不波天在水
四山沉影夜如年已知世事皆身外肯着閒愁到酒邊
宛轉清歌出林表晚煙依約正蒼然

虎丘觀雨

海湧春嵐濕翠鬟生公臺下雨漫漫風迴陰壑奔泉黑
雲鎖蒼池劒氣寒淨洗塵氛開絕境不妨煙靄是奇觀
詩人自得空濛趣悟石軒前獨倚闌

送族弟彥端還衡山

彥字諸孫端甫良秋風訪族自衡陽百年文物家聲在
累葉松楸世澤長君視前人應不忝我於同姓自難忘
不堪相見還相別楚水吳山意渺茫

舊送彥仁一首追錄於此

南望衡陽舊德門虎符元帥有諸孫山川我正懷桑梓
水木君能念本原兩地衣冠曾不乏百年忠孝至今存
相違不盡相留意狼籍秋風酒滿樽

寄顧橫涇

我別橫經三十年同遊都盡獨巍然淵明誰送東籬酒
季子原無負郭田貧病豈知翻益壽聰明莫道不如前
相思相見知何地夢破秦淮月滿川

寄許仲貽

問訊幽人白下蹤若為清世不相容幾回對月思玄度
安得披雲見士龍落日橫塘折楊柳秋風南浦夢芙蓉
相思滿目煙波遠吟到新詩手自封

題吳雪洲磨厓神異卷

齊雲西來巖壁立天削芙蓉千仞碧誰能題字碧雲端
吳生袖有如椽筆蟠金屈鐵紛琳琅天門慌忽蛟龍翔
夢中神授若有得覺來信手筆已忘

二句坡詩也

坡翁此詩

信奇絕千年似為吳生設老夫拈筆贈吳生一笑千峯
秋月明

九日雨中虎丘悟石軒燕集

何處登高寫壯懷生公說法有層臺漫脩故事攜壺上
不負良辰冒雨來應節紫萸聊共把待霜黃菊故遲開

白頭八十三重九竹院浮生又一回

素髮

素髮絲絲不滿梳衰容覽鏡已非吾
蕭條暮景看籬菊次第秋風到井梧
物外機心聊奕旨老來多事坐詩逋
祇應雙足能強健著屐登山未要扶

壬子歲除

殘燈明滅照頭顱八十三齡過隙虛
一歲又從今夕盡餘生消得幾番除
老知無地酬君寵貧喜傳家有父書

獨有梅花堪慰藉春風消息定何如

癸丑元旦

伊喔鄰鷄過短垣起看曙色拂塵冠昇平滿目新頒朔
日月無窮又履端短髮蕭疎霜葉脫壯心零落曉燈殘
從前卉物冰霜盡一樹梅花獨耐寒

夜泊南潯

春寒漠漠擁重裘燈火南潯夜泊舟風勢北來疑雨至
波光南望接天流百年雲水原無定一笑江湖本浪遊

賴是故人同旅宿清樽相對散牢愁

晚泊楊莊

碧雲微歛四山蒼晚泊孤舟對夕陽
店舍寂寥斜帶水人家籬落盡栽桑
風煙入望知何處鷄犬相聞自一鄉
正自旅懷眠不得數聲漁唱起滄浪

寄胡栢泉

當日籌邊事最更曾看疏草識高名
旋收書札渾如面未及交歡已有情
塞上底須論馬失周南空復著書成

遙知西澗春潮急野渡孤舟盡日橫

南樓

狂搔白髮倚南樓落日邊聲入暮愁
萬里長風誰破浪一時滄海遂橫流
敢言多壘非吾恥空復崩天負杞憂
安得甘霖洗兵馬浮雲明滅思悠悠

送袁裕春僉憲之建寧

拾遺省闥歲才更忽領行臺撫建寧
喜見勝之持使節却教汲黯去朝廷
民情有待隨車雨天漢先瞻執法星

雅志高懷何處寫武夷山有晦翁亭

秋夜

四壁鳴蛩露下餘片雲收雨酒醒初風撩墜葉秋聲早
月印空庭夜色虛衰病不禁時敘改蕭閒自與世情疎
若為白首安眠地時有驚塵報羽書

九日遊雙塔院次淵明已酉九日韻

時敘不容淹忽忽寒暑交矧余蒲柳姿望秋已先凋山
林樂閒曠勢途利崇高人性各有適奚但壤與霄爰以

一日歡酬此卒歲勞古來明哲士取材不遺焦啣觴輒
忘世何似栗里陶得酒且復樂安能待來朝

十日遊治平寺再疊前韻

季秋氣未肅鳴禽尚交交澄空霜華薄木葉不盡彫撫
輿陟前岡不覺身已高回視平湖東逸峯聳晴霄但欣
雙目明寧辭一身勞物理會有窮何以心煩焦世情共
擾擾吾樂方陶陶達人悟遷化千載猶一朝

自華亭還吳夜泊磧磯

放棹華亭指故園九峯晴色接吳門
秋風沽酒唐行市斜日維舟磧磯村
墟落風煙沙澍口人家燈火竹籬根
機雲踪跡今何處一望岑山一斷魂

送何元朗南京孔目

一命周行列鎬京閒官剛喜玉堂清
紫薇蘭省聊通籍綠水紅蓮亦宦情
爽氣鍾山秋拄笏春風鰲禁曉聞鶯
白頭老友難為別飛夢先馳建業城

寄何叔毘禮部

為愛君家好弟兄
列官同在鳳凰城
遲遲宮漏微垣靜
浥浥鑪香畫省清
風雨夜堂聯榻處
池塘春草看詩成
相逢相別還相憶
白髮江湖無限情

維亭夜泊

孤篷燈火宿維亭
宿酒微消夢不成
人語煙中江月墮
舟橫渡口夜潮生
閒情歲月都無迹
舊歷村墟尚有情
四野孤霜荻葉冷
時聞沙上水禽聲

除夕

白髮婆娑夜不眠
孫曾繞膝更翩跹
已知明旦非今日
不覺殘齡又一年
舊事悲歡燈影裏
春風消息酒杯前
更闌人靜鷄聲起
却對梅花一燦然

甫田集卷十四

欽定四庫全書

甫田集卷十五

明文徵明撰

詩三十一首

元日試筆

雲霞駘蕩曉光和手折梅花對酒歌暮齒不嫌來日短
霜髭較似去年多東風漸屬青陽候流水微生綠玉波
鳥弄新音晴晝永相看不飲奈春何

竹堂

乘閒上日到僧家
慚愧空門有歲華
滿地碧煙新草色
一痕春意早梅花

人日王氏東園小集

晴颺汎叢條
浮陽散修莽
良時及初正
涉七氣已爽
厥日肇惟人
探占喜融朗
駕言求友生
名園欣獨往
折蔬充朱豆
扶藜企高壤
陟彼墻下岡
寄此天際想
被草晨風和
隔竹春禽響

湛甘泉兵書以詩招遊衡山奉荅

家世衡陽有釣臺江湖流浪未能回
政懷桑梓千年計忽枉封題萬里來
月滿羅浮勞我夢雲埋嶽麓待公開
追攀見說襟懷壯儻許春風杖履陪

寄黃泰泉學士

經時不得嶺南書白首無由慰索居
北闕聲華應藉甚西山爽氣定何如
殘編空復淹司馬當路何人薦子虛
三十年前潞河夢一回相念一踟蹰

除夕

坐戀殘燈思黯然回看殘歷已無緣
萬千舊事空雙髻
八十明朝又六年
笑飲屠蘇甘落後
老嗟筋力不如前
烽煙不隔春風信
次第梅花到酒邊

乙卯元旦

滄溟日日羽書傳
華髮蕭蕭節敘遷
時不可追空逝水
老今如此況烽煙
漫拋舊歷開新歷
却到衰年憶少年
潦倒不妨詩筆在
曉窓和墨寫新篇

病中承次河携樽過訪

病暑經時閉草堂故人挈榼漫相將
高軒恰似清風至雅誼還同夏日長
把酒臨軒疎雨潤捲簾深院碧桐涼
晚來客散詩成處一樹蟬聲對夕陽

閒興

綠陰深覆草堂涼老倦拋書覺晝長
塵土不飛髹几淨寶鑪親注水沉香

蒼苔綠樹野人家手卷鑪薰意自嘉
莫道客來無供設

一杯陽羨雨前茶

繞庭芳草燕差池滿院清陰樹綠離簾捲不知西日下
自持閒客了殘碁

酒闌客散小堂空旋卷疎簾受晚風坐久忽驚涼影動
一痕新月在梧桐

閒門謝客日常扃好鳥隔林時一聲暖氣薰人渾欲醉
碧梧窻下拂桃笙

端溪古研紫瓊瑤斑管新裝亦免毫長日南窻無客至

烏絲小繭寫離騷

乙卯除夕

燈前歲酒笑相酬
鏡裏流光又一周
人世百年原有限
吾生萬事總無憂
餘窮不用焚車送
殘病都從爆竹休
去日已除來日在
春風檢歷又從頭

丙辰除夕

百歲匆匆過隙駒
等閒八十七回除
蹉跎日月前無幾
俯仰乾坤樂有餘
白首詩書重結課
青春草木舊吾廬

由來多病還多壽一笑殘癆未負余

丁巳元旦

昔隨元宰賀正元鹵簿分陳舜樂懸萬炬列星仙仗外

千官鳴珮玉階前履端同慶承天語

是日羣臣致詞畢
上宣旨云履端之

慶與卿
等同之

山壽齊呼祝聖年潦倒今無朝省夢網緼空憶

御爐煙

穀日早起

空庭草色映簾明短髻春風細細生簷溜收聲殘雪盡

窓光落几曉寒輕非賢寧畏蛇年至多難欣占穀日晴
詩思攬人眠不得山禽屋角有新聲

四月

風雨將春去清和四月天桐陰搖白日草色散青煙興
寄琴樽外筋骸杖履前若為消永晝窓下有殘編

春雨綠陰肥雨晴春亦歸花殘鶯獨轉草長燕交飛香
篋青繒扇筠窓白葛衣拋書尋午枕新暖夢依微

五月

逕草侵衫色庭梧生晝陰時光臨角黍穡事望梅霖習
靜鑪薰細醒煩茗椀深草堂賓客散歌枕聽幽禽

夜坐

涼聲傳漏點夜色轉樓陰遙漢三星度空庭萬籟沉草
輝螢箇箇樹影月林林稍覺塵氛遠閒愁不上心

送彭赴嘉興訓導

清時一命忝師儒百里鄰州接里閭志養于今欣有祿
官貧莫嘆食無魚微名聊足酬初志多暇何妨讀舊書

九十老人須在念頻頻書札問興居

東望嘉禾近百程漫隨儒牒去親庭蟬聯宦業承三世
辛苦傳家有一經我老自憐衰鬢白汝行不失舊氍毹
青還應別後鍾情處飛夢時時秀水亭

丁巳除夕

易却桃符拂却塵窮愁殘病總更新三彭漫守庚申夜
萬事重迎戊午春狼籍杯盤聊復醉盡情燈火笑相親
孫曾次第前稱壽慚愧承平白髮人

戊午元旦

黃鳥風簷遞好音
白頭窓下整冠巾
喜聞海上烽煙息
又見人間日月新
霽景騰輝金勝曉
暖痕霏雪玉梅春
何當載酒尋芳去
綠滿郊原草似茵

初春書事三首

疎簾掩映物華鮮
睡起西窓思黯然
落日斷雲收宿雨
暖風纖草漲新煙
寂寥樂事燒燈後
懶慢情懷拄杖前
幽興不緣愁病減
時時覓紙寫新篇

流雲冉冉度湘簾
綠映輕衫草色鮮
淑氣薰人淹宿酒
花香入夢惱春眠
影搖鎖影霏霏日
篆裊鑪薰細細煙
門掩紅塵無過客
自臨南牖了殘編

晴雀飛飛戀草簷
午風漠漠泛茶煙
雪殘東園梅花後
春在南牆細草邊
窻下蠶編消永日
鏡中華髮感流年
詩逋畫債難推脫
應負平生筆硯緣

南樓

南樓日上曉光澄
北郭烟消萬井明
膏雨一番甦弱柳

春風幾處嘒新鶯
祇應舊病隨寒盡
無復閒愁共草生
起遠江梅覓新句
惜花自是老年情


肇孫北行

阿翁九十苦鍾情
倚杖那堪送汝行
壁水去遊天子學
春風須聽上林鶯
壯途初發千山輟
雅志無忘萬里程
三百年來忠孝在
慎言無潰舊家聲

己未元旦

勞生九十漫隨緣
老病支離幸自全
百歲幾人登耄耄

一身五世見曾玄
祇將去日占來日
誰謂增年是減年
次第梅花春滿目
可容愁到酒樽前



甫田集卷十五